

I – AKTI OPĆINSKOG VIJEĆA

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKO VIJEĆE



Broj: 01-05-3705/16-AP-15
Datum, 27.2.2017. godine

Na osnovu člana 13. stav 2. alineja 12. Zakona o principima lokalne samouprave («Službene novine Federacije BiH», broj: 49/06 i 51/09) i člana 25. Statuta općine Zavidovići («Službeni glasnik općine Zavidovići», broj: 5/2008 i 5/a/2008), Općinsko vijeće Zavidovići na 5. sjednici održanoj 27.02.2017. godine, donijelo je

O D L U K U
o priznanjima općine Zavidovići

DIO PRVI - OPĆE ODREDBE

Član 1.
(Predmet)

Ovom Odlukom utvrđuju se priznanja općine Zavidovići, njihov sadržaj i izgled, nosioci priznanja, postupak predlaganja dodjele priznanja, donošenja odluke o dodjeli priznanja, način uručivanja priznanja, razlozi i postupak opoziva dodijeljenih priznanja, nadzor, kaznene, prelazne i završne odredbe.

Član 2.
(Nosioci priznanja)

(1) Priznanja općine Zavidovići dodjeljuju se pojedincima, ustanovama, organizacijama, udruženjima, privrednim društvima, drugim pravnim subjektima, te stranim licima i međunarodnim organizacijama za izuzetan i stalan doprinos u promoviranju općine Zavidovići, unapređenju rada i dostignućima od općeg interesa za bolji život građana općine Zavidovići, za međunarodnu promociju općine Zavidovići, unapređenje čovjekove životne i radne sredine, očuvanju prirodne i kulturne baštine, doprinos u razvoju općine Zavidovići u oblasti privrede i zapošljavanja, nauke, kulture, sporta, obrazovanja, zdravstva, humanitarnog rada, te djelima lične požrtvovanosti i hrabrosti.

(2) Pojedina priznanja propisana ovom Odlukom mogu se dodjeljivati posthumno.

Član 3.
(Izuzetci)

Priznanja se ne mogu dodjeljivati zaposlenim u organima uprave svih nivoa vlasti, nosiocima izvršnih funkcija svih nivoa vlasti, vijećnicima Općinskog vijeća Zavidovići, poslanicima u skupštinama kantona, zastupnicima i delegatima u Parlamentu Federacije Bosne i Hercegovine, poslanicima i delegatima u Parlamentarnoj skupštini Bosne i Hercegovine i zastupnicima u Skupštini Brčko Distrikta Bosne i Hercegovine za vrijeme trajanja radnog odnosa odnosno mandata u navedenim institucijama.

DIO DRUGI - VRSTE PRIZNANJA

Član 4.
(Priznanja)

- (1) Priznanja općine Zavidovići su:
 - a) Plaketa općine Zavidovići,
 - b) Počasni građanin općine Zavidovići,
 - c) Zahvalnica i pohvala općine Zavidovići.
- (2) Zabranjeno je omalovažavanje, zloupotreba, uništavanje ili prodaja priznanja iz prethodnog stava.

POGLAVLJE I – PLAKETA OPĆINE ZAVIDOVIĆI

Član 5.
(Nosioци priznanja i način dodjele)

- (1) Plaketa općine Zavidovići (u daljem tekstu: Plaketa) je najviše općinsko priznanje koje Općinsko vijeće Zavidovići dodjeljuje pojedincu, ustanovi, organizaciji, udruženju, privrednom društvu i drugim pravnim subjektima za izuzetna ostvarenja i postignute rezultate rada na svim područjima privrednog i društvenog života, a koja su naročito značajna za općinu Zavidovići i njezinu afirmaciju u narednim periodima.
- (2) Plaketa se može dodijeliti svake četiri godine najviše u jednom primjerku.

Član 6.
(Uslovi za dodjelu)

Uslovi za dodjelu Plakete podrazumijevaju aktivnosti za ostvarenje značajnih inovacija, ostvarenje značajnih djela i ukupni rezultati rada nosioca priznanja iz prethodnog člana ove Odluke koji su doprinijeli kroz nova ulaganja u proširenje proizvodnih kapaciteta i zapošljavanju, dali izuzetan doprinos odbrambeno-oslobodilačkom ratu ili su njihovi doprinosi i rezultati rada stekli značajnu primjenu u jednom ili više područja privrednog i društvenog života.

Član 7.
(Oblik i forma Plakete)

- (1) Plaketa je izrađena u obliku dva lista formata B-4 koji čine cjelinu, savijena po polovini i podijeljena plavom vrpcom širine od 1 cm uvezana u mapu istih dimenzija.
- (2) Mapa je presvučena materijalom plave boje na čijoj je prvoj vanjskoj stranici utisnut zlatotiskom grb općine Zavidovići i naziv priznanja „PLAKETA OPĆINE ZAVIDOVIĆI“.
- (3) Na lijevoj strani unutrašnjeg lista mape upisuje se zaglavlje „BOSNA I HERCEGOVINA, FEDERACIJA BOSNE I HERCEGOVINE, ZENIČKO-DOBOJSKI KANTON, OPĆINA ZAVIDOVIĆI, OPĆINSKO VIJEĆE“ sa grbom općine Zavidovići centriranim na sredini stranice.
- (4) Ispod teksta iz prethodnog stava upisuje se sljedeći tekst: „Na osnovu Odluke Općinskog vijeća Zavidovići o dodjeli Plakete općine Zavidovići („Službeni glasnik općine Zavidovići“, broj: __) dodjeljuje se:“.
- (5) Na sredini lijeve strane unutrašnjeg lista mape ispod teksta iz prethodnog stava upisuje se puni naziv priznanja „PLAKETA OPĆINE ZAVIDOVIĆI“, ime i prezime ili naziv dobitnika Plakete. U lijevom donjem uglu je upisano mjesto, datum i broj odluke o dodjeli Plakete, a u desnom donjem dijelu je ime i prezime predsjedavajućeg/e Općinskog vijeća

Zavidovići sa mjestom za potpis i otisak pečata. Na unutrašnjem desnom listu mape upisuje se izvod iz obrazloženja odluke o dodjeli Plakete i drugi prikladan tekst.

(6) Veličina i raspored grba i slova određuju se proporcionalno sa veličnom formata mape.

Član 8.

(Grb općine Zavidovići)

Uz Plaketu se dodjeljuje grb općine Zavidovići u odgovarajućoj kutiji iste boje kao i mapa Plakete sa upisanim imenom i prezimenom ili nazivom dobitnika Plakete, nazivom priznanja «PLAKETA OPĆINE ZAVIDOVIĆI », mjesto, broj i datum odluke o dodjeli Plakete. Na poklopcu kutije utisnut je grb općine Zavidovići u zlatotisku.

POGLAVLJE II – POČASNI GRAĐANIN OPĆINE ZAVIDOVIĆI

Član 9.

(Nosioč priznanja i način dodjele)

(1) Priznanje Počasni građanin općine Zavidovići je priznanje koje Općinsko vijeće Zavidovići dodjeljuje građanima Bosne i Hercegovine i stranim državljanima koji su u dužem vremenskom periodu vodili aktivnosti i poduzimali konkretne radnje u pravcu afirmacije općine Zavidovići, koji su konkretnim radnjama i djelovanjem doprinosili razvoju općine Zavidovići u određenim poljima privrednog i društvenog djelovanja.

(2) Priznanje Počasni građanin općine Zavidovići može se dodijeliti svake četiri godine najviše u jednom primjerku.

(3) Izuzetno priznanje Počasni građanin općine Zavidovići može se dodijeliti u slučaju upriličjenja prigodne posjete ili nastanku događaja koji po prirodi ovog priznanja nalažu njegovu dodjelu bez obzira na protek roka iz prethodnog stava.

Član 10.

(Uslovi za dodjelu)

(1) Počasni građanin može biti lice koje se aktivno zalagalo i uspješno djelovalo na polju poboljšanja međunacionalnih odnosa, ljudskih prava i sloboda, vjere i kulture, demokratskih tekovina, humanosti, solidarnosti, razvoja privrede i zapošljavanja i drugim poljima kojima se stvaraju uslovi boljeg življenja.

(2) Priznanje Počasni građanin ne može se dodijeliti osobama sa prebivalištem u općini Zavidovići.

(3) Nosioču priznanja koji je proglašen Počasnim građaninom dodjeljuje se Ključ općine Zavidovići.

Član 11.

(Oblik i forma)

Priznanje Počasni građanin općine Zavidovići je identičnog oblika i sadržaja kao i Plaketa iz člana 7. ove Odluke, osim teksta koji glasi: „POČASNI GRAĐANIN OPĆINE ZAVIDOVIĆI“.

Član 12.

(Ključ općine Zavidovići)

Uz priznanje Počasni građanin općine Zavidovići se dodjeljuje Ključ općine Zavidovići izrađen od ukrasnog materijala smješten u odgovarajućoj kutiji iste boje kao i mapa sa upisanim imenom i prezimenom dobitnika priznanja, nazivom „KLJUČ OPĆINE ZAVIDOVIĆI ZA POČASNOG GRAĐANINA“, broj i datum Odluke o dodjeli priznanja

Počasni građanin općine Zavidovići. Na poklopcu kutije utisnut je grb općine Zavidovići u zlatotisku.

POGLAVLJE III – ZAHVALNICA I POHVALA OPĆINE ZAVIDOVIĆI

Član 13.

(Nosioci priznanja i uslovi dodjele)

(1) Zahvalnica i pohvala općine Zavidovići dodjeljuje se u znak odavanja priznanja i zahvalnosti priznatim i uspješnim pojedincima, ustanovama, organizacijama, udruženjima, privrednim društvima i drugim pravnim subjektima kao i stranim građanima i međunarodnim organizacijama koji svojim radom i određenim djelima daju doprinos razvoju i očuvanju civilizacijskih vrijednosti društva, očuvanju tradicije i kulturne baštine, razvoju lokalne samouprave, humanitarnog djelovanja i ostalih aktivnosti i radnji koje afirmišu općinu Zavidovići i koji doprinose imidžu općine Zavidovići kao prostora bezbjednog i ugodnog življenja i privređivanja.

(2) Zahvalnice i pohvale dodjeljuje Općinski načelnik, a prijedlog za njihovu dodjelu može predložiti svako pravno i fizičko lice sa područja općine Zavidovići.

(3) Zahvalnica se može pojedincu dodijeliti i posthumno.

Član 14.

(Oblik i forma zahvalnice i pohvale)

(1) Zahvalnica i pohvala je urađena u obliku dva lista formata A-4 koji čine cjelinu, savijena po polovini i podijeljena plavom vrpcom širine od 1 cm uvezana u mapu istih dimenzija.

(2) Mapa je presvučena materijalom plave boje na čijoj je prvoj vanjskoj stranici utisnut zlatotiskom grb općine Zavidovići i naziv priznanja ZAHVALNICA / POHVALA OPĆINE ZAVIDOVIĆI.

(3) Na lijevoj strani unutrašnjeg lista mape upisuje se zaglavlje „BOSNA I HERCEGOVINA, FEDERACIJA BOSNE I HERCEGOVINE, ZENIČKO-DOBOJSKI KANTON, OPĆINA ZAVIDOVIĆI, OPĆINSKI NAČELNIK“ sa grbom općine Zavidovići centriranim na sredini stranice.

(4) Ispod teksta iz prethodnog stava upisuje se sljedeći tekst: „Na osnovu člana 21. stav 1. Odluke o priznanjima općine Zavidovići („Službeni glasnik općine Zavidovići“, broj: __), Općinski načelnik Zavidovići dodjeljuje:“.

(5) Na sredini lijeve strane unutrašnjeg lista mape ispod teksta iz prethodnog stava upisuje se puni naziv priznanja „ZAHVALNICA / POHVALA“, ime i prezime ili naziv dobitnika zahvalnice ili pohvale. U lijevom donjem uglu je upisano mjesto i datum dodjele zahvalnice ili pohvale, a u desnom donjem dijelu je ime i prezime Općinskog načelnika sa mjestom za potpis i otisak pečata. Na unutrašnjem desnom listu mape upisuje se prikladan tekst razloga dodjele zahvalnice ili priznanja.

(6) Veličina i raspored grba i slova se određuju proporcionalno sa veličnom formata mape.

(7) Nosiocu priznanja iz člana 13. ove Odluke može biti dodijeljeno više od jedne zahvalnice ili pohvale.

DIO TREĆI – POSTUPAK I KRITERIJI ZA DODJELU PRIZNANJA**Član 15.**

(Inicijativa za dodjelu priznanja)

Inicijativu za dodjelu priznanja iz člana 4. stav 1. tačka a) i b) ove Odluke mogu podnositi grupa građana od najmanje 20 lica sa svojeručnim potpisom i matičnim brojem, ustanove, privredna društva, savjeti mjesnih zajednica, udruženja građana, Općinski načelnik, vijećnici Općinskog vijeća Zavidovići, radna tijela Općinskog vijeća Zavidovići i drugi pravni subjekti (u daljem tekstu: podnosioci prijedloga).

Član 16.

(Izuzeća od predlaganja)

(1) Podnosilac inicijative ne može sam sebe predlagati, niti može biti kandidat za dodjelu priznanja.

(2) U slučaju da podnosilac inicijative bude predložen i kao kandidat za priznanje, dužan je da pismeno odustane od prijedloga ili kandidature.

(3) Općinsko priznanje iste vrste ne može se dodijeliti nosiocu priznanja kojem je već dodijeljeno takvo priznanje, osim u slučaju dodjele zahvalnice i pohvale.

Član 17.

(Forma inicijative)

(1) Inicijativa iz člana 15. ove Odluke podnosi se u pismenoj formi sa obrazloženim navodima svih relevantnih činjenica za ocjenu zasluga odnosno uspjeha predloženog kandidata, te mora sadržavati potrebne dokumente i priloge kojim se dokazuju činjenice iz inicijative.

(2) Inicijativa mora sadržavati podatke o podnosiocu inicijative, biografiju kandidata i naznaku priznanja za koje se predlaže.

(3) Nepotpune inicijative neće se uzimati u razmatranje.

Član 18.

(Pokretanje postupka)

(1) Postupak za dodjelu priznanja iz člana 4. stav 1. tačka a) i b) ove Odluke blagovremeno pokreće Komisija za društvene djelatnosti, ljudska prava, mlade i ravnopravnost spolova Općinskog vijeća Zavidovići.

(2) Komisija iz prethodnog stava objavljuje javni poziv za podnošenje inicijativa za dodjelu priznanja iz člana 4. stav 1. tačka a) i b) ove Odluke.

(3) Javni poziv se objavljuje u sredstvima informisanja, na oglasnoj tabli i web stranici Općine Zavidovići i oglasnim tablama mjesnih zajednica u trajanju 30 dana.

Član 19.

(Rokovi)

(1) Komisija blagovremeno pokreće postupak podnošenja inicijativa za dodjelu priznanja iz člana 4. stav 1. tačka a) i b) ove Odluke u rokovima koji će osigurati donošenje Odluke o dodjeli priznanja na sjednici Općinskog vijeća Zavidovići koja prethodi svečanoj sjednici Općinskog vijeća u povodu obilježavanja 15. septembra – Dana općine Zavidovići.

(2) Nakon završetka javnog poziva iz člana 18. stav 2. ove Odluke Komisija je dužna da u roku od 15 dana podnesene inicijative sistematizuje, pregleda i utvrdi njihovu potpunost u

skladu sa ovom Odlukom, te izradi prijedlog odluke o dodjeli priznanja sa pojedinačnim obrazloženjem dodjele priznanja kandidatu za svako priznanje.

Član 20.**(Rangiranje kandidata)**

(1) Komisija Općinskog vijeća Zavidovići na osnovu kriterija rangira podnesene inicijative i dostavlja prijedlog Općinskom vijeću Zavidovići.

(2) Kriteriji za rangiranje kandidata za dodjelu priznanja Plakete su:

a) Za ustanove, organizacije, udruženja, privredna društva i druge pravne subjekte koji u pravilu sa kontinuitetom u jednom vremenskom periodu koji nije kraći od deset godina daju:

- doprinos razvoju općine Zavidovići kroz nova ulaganja u proširenje proizvodnih kapaciteta,
- doprinos u značajnijem upošljavanju nove radne snage,
- rezultate u oblasti zdravstva, obrazovanja, nauke, kulture, sporta, zaštite radne i prirodne sredine i koji se značajno angažuju na harmonizaciji međuljudskih i međunacionalnih odnosa i ostvarivanja prava građana,
- izuzetan doprinos u drugim područjima rada i djelovanja, te da taj rad i djelovanje doprinose ostvarivanju interesa općine Zavidovići.

b) Za pojedince koji su u pravilu sa kontinuitetom u jednom dužem periodu koji nije kraći od 10 godina :

- postali inovatori na tehničkim i drugim unapređenjima,
- posebno doprinijeli razvoju lokalne samouprave u općini i mjesnim zajednicama,
- ostvarili izuzetne rezultate u oblasti sporta, vaspitno-obrazovnom radu, naučnom radu, u oblasti umjetnosti i kulture,
- kao donatori humano postupali prema pojedincima i kolektivima,
- objavili više naučnih verifikovanih radova,
- dali izuzetan doprinos u drugim područjima rada i djelovanja.

(3) Izuzetno od prethodnog stava tačka b) priznanje Plaketa može se dodijeliti nosiocu priznanja koji je iskazao izuzetnu hrabrost i požrtvovanje u određenim situacijama ili dao izuzetan doprinos odbrambenom ratu bez obzira na protek vremena i kontinuitet u radu i djelovanju.

(4) Za rangiranje kandidata za dodjelu priznanja Počasni građanin općine Zavidovići primenjuju se kriteriji iz stava (2) tačka b) ovog člana, s tim što rad nosioca priznanja na aktivnom zalaganju i uspješnom djelovanju mora biti sproveden u kontinuitetu u jednom vremenskom periodu koji nije kraći od pet godina.

(5) Izuzetno od prethodnog stava priznanje Počasni građanin općine Zavidovići može se dodijeliti nosiocu priznanja koji je ostvario impozantan rezultat ili podvig u sferi društvenog i privrednog života, iskazao izuzetnu hrabrost i požrtvovanje u određenim situacijama ili dao izuzetan doprinos odbrambenom ratu bez obzira na protek vremena i kontinuitet u radu i djelovanju.

Član 21.**(Dodjela priznanja)**

(1) Odluku o dodjeli priznanja iz člana 4. stav 1. tačka a) i b) ove Odluke donosi Općinsko vijeće Zavidovići, a zahvalnice i pohvale dodjeljuje Općinski načelnik.

(2) Uručivanje priznanja iz prethodnog stava vrši se na svečanoj sjednici Općinskog vijeća u povodu obilježavanja 15. septembra – Dana općine Zavidovići.

(3) Pohvale i zahvalnice se mogu uručivati i bez održavanja sjednice iz prethodnog stava, kao i u slučaju uručanju priznanja Počasni građanin općine Zavidovići iz člana 13. stav 3. ove Odluke.

(4) Zahavalnica dodijeljena pojedincu posthumno uručuje se članu domaćinstva umrlog.

(5) Ukoliko se utvrdi niti jedan predloženi kandidat ne ispunjava kriterije iz člana 20. ove Odluke za dodjelu jednog od priznanja iz člana 4. stav 1. tačka a) i b) ove Odluke, Općinsko vijeće Zavidovići neće donositi Odluku o dodjeli priznanja bez obzira na protek roka iz člana 5. stav 2. i 9. stav 2. ove Odluke.

Član 22.

(1) Priznanja općine Zavidovići iz člana 4. stav 1. tačka a) i b) ove Odluke uručuje predsjedavajući/a Općinskog vijeća Zavidovići, a pohvale i zahvalnice uručuje Općinski načelnik.

(2) Imena dobitnika priznanja općine Zavidovići objavljuju se u «Službenom glasniku općine Zavidovići».

DIO ČETVRTI – OPOZIV PRIZNANJA

Član 23.

(Uvjeti za opoziv priznanja)

(1) Priznanja koja su dodijeljena u skladu sa ovom Odlukom i ranijim odlukama mogu se opozvati.

(2) Priznanja će se opozvati ako je dobitnik priznanja pravosnažnom sudskom presudom osuđen od Međunarodnog suda za ratne zločine ili koji je pravosnažnom sudskom presudom, od bilo kojeg suda na području Bosne i Hercegovine ili drugog suda matične zemlje u slučaju kad je dobitnik strani državljanin, osuđen na kaznu zatvora za krivično djelo protiv života i tijela, protiv slobode i prava građana, protiv dostojanstva osobe i naroda, protiv imovine, protiv službene i druge odgovorne dužnosti, protiv osnova društvenog uređenja i sigurnosti.

(3) Priznanja se mogu opozvati i ako je dobitnik osuđen bilo kakvom pravosnažnom sudskom presudom za zloupotrebu službenog položaja.

Član 24.

(Postupak opoziva priznanja)

(1) Opoziv priznanja vrši se na način i po postupku za dodjelu priznanja.

(2) Odluka o opozivu priznanja objaviti će se u «Službenom glasniku općine Zavidovići».

DIO PETI – NADZOR NAD PRIMJENOM OVE ODLUKE

Član 25.

(Nadzor)

Nadzor nad primjenom ove Odluke vrši Stručna služba Općinskog vijeća Zavidovići.

DIO ŠESTI – KAZNENE ODREDBE

Član 26.

(Novčana kazna)

(1) Novčanom kaznom u iznosu 100,00 do 500,00 KM kaznit će se fizičko lice ako javno omalovažava, zloupotrebljava, uništi ili proda priznanje propisano ovom Odlukom (član 4. stav 2.).

(2) Novčanom kaznom u iznosu 200,00 do 1.000,00 KM kaznit će se pravno lice za prekršaj iz prethodnog stava, i odgovorno lice u pravnom licu novčanom kaznom u iznosu 500,00 KM.

DIO SEDMI – PRIJELAZNE I ZAVRŠNE ODREDBE**Član 27.**

(Nemogućnost uručenja priznanja)

Ukoliko iz bilo kojih razloga priznanje ne može biti uručeno nosiocu priznanja, priznanje se predaje bračnom drugu ili djeci o čemu se izdaje potvrda.

Član 28.

(Nadležnost)

Stručne i administrativne poslove za Komisiju za društvene djelatnosti, ljudska prava, mlade i ravnopravnost spolova Općinskog vijeća Zavidovići obavlja Stručna služba Općinskog vijeća.

Član 29.

(Obezbjedenje sredstava)

Sredstva za provođenje ove Odluke obezbjeđuju se iz Budžeta općine Zavidovići.

Član 30.

(Započeti postupci)

Postupci dodjele priznanja započeti do dana stupanja na snagu ove Odluke, okončat će se po odredbama Odluke iz člana 32. ove Odluke.

Član 31.

(Nosioci Spomen plakete općine Zavidovići)

Nosioci priznanja Spomen plakete općine Zavidovići dodijeljene po odredbama Odluke iz člana 32. ove Odluke ne mogu biti predlagani niti im se može dodijeliti priznanje Plaketa.

Član 32.

(Prestanak važenja)

Stupanjem na snagu ove Odluke prestaje da važi Odluka o ustanovljenju i dodjeli Spomen plakete općine Zavidovići i drugih općinskih priznanja («Službeni glasnik općine Zavidovići», broj: 3/2001).

Član 33.

(Stupanje na snagu)

Ova Odluka stupa na snagu prvi naredni dan od dana objavljivanja u «Službenom glasniku općine Zavidovići».

**PREDSJEDAVAJUĆI
OPĆINSKOG VIJEĆA**

(M.P.)

Redžo Seferović, s.r.